

# «Las lingias grondas paran da persvader»

Tge di Andreas Glaser da las mesiras grischunas per promover la plurilinguitad?

■ (fmr/dat) L'emna passada ha la regenza grischuna preschentà ses catalog da mesiras per promover la plurilinguitad en il chantun. Il stausch da partenza per elavurar quel catalog, aveva dà in studi dal Center da democrazia ad Aarau. Il responsabel dal studi, Andreas Glaser, è a prima vista satisfatg da las propostas. L'emna passada ha il chantun Grischun, suenter ina «pagliola» pli lunga da var in onn, preschentà ses catalog da mesiras per dar svung e schlantsch al rumantsch ed al talian. In studi dal Center per democrazia Aarau – realisà per incumbensa da l'Uffizi federal da cultura e publitgà la primavaira dal 2019 – aveva fatg grond alarm. La retschertga aveva numnadamain mussà si gronds deficits. Tar il rumantsch pertutgan quels tranter auter la scola, ils meds d'instrucziun u simplamain era l'applicaziun consequenta da la lescha da linguas.

## In post da «polizia»

Ussa è damai sin maisa la resposta da la regenza, pli exact or dals mauns dal Departament d'educaziun, cultura e protecziun da l'ambient. Quella resposta consista da var 80 mesiras concretas. L'emprima e la pli prominenta mesira è senza dubi quella da stgaffir proximamain in post da «polizia per las linguas minoritaras» en l'administraziun chantunala. En in jargon administrativ sa numna quel post: «Post da coordinaziun «Administraziun plurilingua». Quel vules cuntanscher ch'il chantun vegnia administrà ils proxims onns en moda e maniera pli plurilingua, resguardond meglier il talian e rumantsch.



«I fiss d'evitar in supergau sco tar il Museum d'art.»

Andreas Glaser

Sco la FMR ha rapportà mesemna è il resun sin l'entir catalog da mesiras positiv. Las duas organizaziuns linguisticas da las linguas minoritaras en il Grischun èn satisfatgas. Però tant la Lia Rumantscha (LR) sco era la Pro Grigioni Italiano (PGI) intunan ch'i saja impurtant che las mesiras vegnian ussa concretisadas, realisadas ed er pajadas endretg.

## «In instrument impurtant»

E tge di quella persuna che aveva mess, cun ses institut, il det en la plaja? Sin dumonda da la FMR scriva *Andreas Glaser*,

directur dal Center per democrazia, ch'el n'haja anc betg s'occupà en detagl cun tut las propostas dal vast catalog, però «las lingias grondas paran da persvader». Andreas Glaser suttastritga ch'il post per incumbensas linguisticas en l'administraziun saja «in instrument impurtant per rinforzar la posiziun da las linguas minoritaras». Ed exact sco la LR e la PGI spetga er el ussa co las finamiras e mesiras vegnan transponidas en la pratica, vul dir co l'administraziun chantunala vegnia obligada da resguardar tut sias finamiras. Però co sa lascha

quai mesirar? – Tenor Glaser vai en in emprim pass per signals vers anora. Ed el numna sco exempel las tavlas tudeschtas tar plazzals da bajegiar en territoris rumantschs u talians ch'han dà da discurre il davos temp, p.ex. tar projects da vias. Andreas Glaser: «Là han tscherts constructurs tar il chantun in problem ch'ins sto eliminar.» In segund exempel ch'il director dal Center per democrazia menziunescha è quel dal Museum d'art dal Grischun ch'aveva installà vi da l'edifici nov mo inscripziuns en lingua tudestga. Tenor Andreas Glaser in «supergau ch'i fiss dad evitar» en avegnir.

## In catalog cun 80 mesiras

(fmr/dat) L'entir palpieri cun las mesiras chantunales, publitgà l'emna passada sut il motto «Fermezza en la diversitad», consista da var 80 mesiras concretas. Quellas pertutgan dad ina vart bain l'administraziun chantunala, da l'autra vart datti però era finamiras ed incumbensas per uniuns ed instituziuns ordaifer l'administraziun – sco p.ex. la LR, la PGI, la FMR, la Scola auta da pedagogia dal Grischun u perfin Grischun Vacanzas. La fin finala vai, cun ils plets da *Jon Domenic Parolini*, chau dal Departament d'educaziun, cultura e protecziun da l'ambient, per il suandant: «La finamira è da dar dapli preschientscha a la plurilinguitad en il Grischun.»